

四庫全書

集部

欽定四庫全書

集部

唐人萬首絕句選卷五

詳校官中書臣涂日煥

主事銜臣徐以坤覆勘

總校官進士臣朱鈴

校對官主事臣陳墉

謄錄監生臣單呈智

欽定四庫全書

唐人萬首絕句選卷四

宋 洪邁 元本

刑部尚書王士禎選

七言二

李益

夜上受降城聞笛

回樂峰前沙似雪
受降城外月如霜
不知何處吹蘆管

一夜征人盡望鄉

邊思

腰垂錦帶佩吳鉤
走馬曾防玉塞秋
莫笑關西將家子
祇將詩思入涼州

柳楊送客

青楓江畔白蘋洲
楚客傷離不待秋
君見隋朝更何事
柳楊南渡水悠悠

從軍北征

天山雪後海風寒橫笛偏吹行路難磧裏征人三十萬
一時回首月中看

行舟

柳花飛入正行舟卧引菱花信碧流聞道風光滿楊子
天晴共上望鄉樓

隋宮燕

燕語如傷舊國春宮花欲落旋成塵自從一閉風光後
幾度飛來不見人

送人歸岳陽

烟草連天楓樹齊
岳陽歸路子規啼
春江萬里巴陵戍
落日看沈楚水西

臨渚池見蕃使列名

漠南春色到渚池
邊柳青青塞馬嘶
多萬里江山今不閉
漢家頻許郅支和

寫情

水紋珍簟思悠悠
千里佳期一夕休
從此無心愛良夜

任他明月下西樓

聽曉角

邊霜昨夜墮關榆
吹角當城片月孤
無限塞鴻飛不度
秋風引入小單于

汴河曲

汴水東流無限春
隋家宮闕已成塵
行人莫上長隄望
風起楊花愁殺人

暖川

胡風凍合鷗鵝泉牛馬千羣逐暖川塞外征行無盡日
年年移帳雪中天

宮怨

露溼晴花春殿香月明歌吹在昭陽似將海水添宮漏
共滴長門一夜長

度破汭沙

破汭沙頭雁正飛鷗鵝泉上戰初歸平明日出東南地
滿磧寒光生鐵衣

盧綸

古豔詞

自拈裙帶結同心
暖處偏知香氣深
愛捉狂夫問閒事
不知歌舞用黃金

宮中樂 二首

臺殿雲涼秋色微
君王初賜六宮衣
樓船泛罷歸猶早
行遣才人鬪射飛

雲日呈祥禮物殊
彤庭生獻五單于
塞垣萬里無飛鳥

可是邊城用郅都

春日有懷

桃李風多日欲陰
伯勞飛處落花深
貧居靜久難逢信
知隔春山不可尋

曲江春望 二首

菖蒲翻葉柳交枝
暗上蓮舟鳥不知
更到無花最深處
玉樓金殿影參差

泉聲遍野入芳洲
擁沫吹花上碧流
落日行人漸無路

巢蜂乳燕滿高樓

司空曙

登峴亭

峴山回首望秦關
南向荊州幾日還
今日登臨惟有淚
不知風景在何山

古寺花

共愛芳菲此樹中
千跗萬蘂裹枝紅
遲遲欲去猶回望
覆地無人滿寺風

發渝州却寄韋判官

紅燭津亭夜見君
繁弦急管兩紛紛
平明分手空江上
唯有猿聲滿水雲

送盧徹之太原

榆落鵬飛關塞秋
黃雲畫角見并州
翩翩羽騎雙旌後
上客親隨郭細侯

峽口送友人

峽口花飛欲盡春
天涯去住淚沾巾
來時萬里同為客

今日翻成送故人

李端

送劉侍御

幾人同去謝宣城未及酬恩隔死生
唯有夜猿知客恨
嶧陽溪路第三聲

郎士元

柏林寺南望

谿上遙聞精舍鐘泊舟微徑度深松
青山霽後雲猶在

畫出西南四五峰

柳中庸

河陽橋送別

黃河流出有浮橋
晉國歸人此路遙
若傍關干千里望
北風驅馬雨瀟瀟

征人怨

歲歲金河復玉關
朝朝馬策與刀環
三春白雪歸青冢
萬里黃河繞黑山

涼州曲

關山萬里遠征人一望關山淚滿巾
青海戍頭空有月黃沙磧裏本無春

冷朝陽

送別紅線

采菱歌怨木蘭舟送客魂銷百尺樓
還似洛妃乘霧去碧天無際水空流

張繼

楓橋夜泊

月落烏啼霜滿天
江楓漁火對愁眠
姑蘇城外寒山寺
夜半鐘聲到客船

劉方平

送別

華亭霽色滿今朝
雲裏檣竿去轉遙
莫怪山前深復淺
清淮一日兩回潮

月夜

更深月色半人家，北斗闌干南斗斜。
今夜偏知春氣暖，蟲聲新透綠窓紗。

春怨

紗窓日落漸黃昏，金屋無人見淚痕。
寂寞空庭春欲晚，梨花滿地不開門。

顧況

聽角思歸

故園黃葉滿青苔，夢破城頭曉角哀。
此夜斷腸人不見，

起行殘月影徘徊

宮詞

玉樓天半起笙歌
風送宮嬪笑語和
月殿影開聞夜漏
水精簾捲近秋河

聽歌

子夜新聲何處傳
悲翁更憶太平年
只今法曲無人唱
已逐霓裳飛上天

宿昭應

武帝祈靈太一壇
新豐樹色繞千官
那知今夜長生殿
獨閉空山月影寒

小孤山

古廟楓林江水邊
寒鴉接飯雁橫天
大孤山遠小孤出
月照洞庭歸客船

葉道士山房

水邊垂柳赤闌橋
洞裏仙人碧玉簫
近得麻姑書信否
潯陽向上不通潮

竹枝

帝子蒼梧不復歸
洞庭葉下荆雲飛
巴人夜唱竹枝後
腸斷曉猿聲漸稀

憶故園

惆悵多山人復稀
杜鵑啼處淚沾衣
故園此去千餘里
春夢猶能夜夜歸

戴叔倫

夜發袁江寄李潁川劉侍御

半夜回舟入楚鄉月明山水共蒼蒼孤猿更叫秋風裏
不是愁人亦斷腸

湘南即事

盧橘花開楓葉裏出門何處望京師沅湘日夜東流去
不為愁人住少時

嚴維

丹陽送人

丹陽郭裏送行舟一別心知兩地秋日晚江南望江北

寒鴉飛盡水悠悠

李涉

題開聖寺

宿雨初收草木濃
羣鴉飛散下堂鐘
長廊無事僧歸院
盡日門前獨看松

過湖州妓宋態

曾識雲仙至小時
芙蓉頭上綰青絲
當時驚覺高唐夢
唯有如今宋玉知

潤州聽暮角

江城吹角水茫茫
曲引邊聲怨思長
驚起暮天沙上雁
海門斜去兩三行

宿武關

遠別秦城萬里遊
亂山高下入商州
關門不鎖寒溪水
一夜潺湲送客愁

竹枝詞二首

石壁千重樹萬重
白雲斜掩碧芙蓉
昭君溪上年年月

偏照嬋娟色最濃

十二峰頭月欲低
空舫灘上子規啼
孤舟一夜東歸客
泣向春風憶建溪

哭田布

魏師臨陣却抽營
誰管豺狼作信兵
縱使將軍能伏劍
何人島上哭田橫

京口送朱晝之淮南

兩行客淚愁中落
萬樹山花雨後殘
君到揚州見桃葉

為傳風水渡江難

邠州詞獻高尚書 二首

單于都護再分疆西引雙旌出帝鄉朝日詔書添戰馬
即聞千騎取河湟

將家難立是威聲不見多傳衛霍名一自元和平蜀後
馬頭行處即長城

李約

過華清宮

君王遊樂萬幾輕一曲霓裳四海兵玉輦升天人已盡
故宮猶有樹長生

權德輿

贈天竺靈隱二寺主

石路泉流兩寺分尋常鐘磬隔山聞山僧半在中峰住
共占清猿與白雲

雜興二首

琥珀尊開月映簾調弦理曲指纖纖含羞斂態勸君住

更奏新聲刮骨鹽

巫山雲雨洛川神
珠襪香腰穩稱身
惆悵妝成君不見
含情起立問傍人

武元衡

春興

楊柳陰陰細雨晴
殘花落盡見流鶯
春風一夜吹鄉夢
夢逐春風到洛城

送張司錄赴京

江南烟雨塞鴻飛
西府文章謝掾歸
相送汀洲蘭杜晚
菱歌一曲淚沾衣

題嘉陵驛

悠悠風旆繞山川
山驛空濛雨似烟
路半嘉陵頭已白
蜀門西更上青天

聽歌

月上重樓絲管秋
佳人夜唱古梁州
滿堂誰是知音者
不惜千金與莫愁

汴州聞角

何處金笳月裏悲
悠悠邊客夢先知
單于城上關山曲
今日中原總解吹

韓愈

湘中酬張十一功曹

休垂絕徼千行淚
共泛清湘一葉舟
今日嶺猿兼越鳥
可憐同聽不知愁

和李二十八司勳連昌宮

夾道疎槐出老根
高甍巨桷壓山原
宮前遺老來相問
今是開元幾葉孫

晚次宣溪酬張使君

潮州南去接宣溪
雲水蒼茫日向西
客淚數行先自落
鷓鴣休傍耳邊啼

同張水部籍遊曲江寄白二十二舍人

漠漠輕陰晚自開
青春白日映樓臺
曲江水滿花千樹
有底忙時不肯來

次潼關先寄張十二閣老

荆山已去華山來日照潼關四扇開
刺史莫辭迎候遠相公新破蔡州迴

桃林夜賀晉公

西來騎火照山紅夜宿桃林臘月中
手把命珪兼相印一時重疊賞元功

柳宗元

柳州二月

官情羈思共悽悽春半如秋意轉迷山城過雨百花盡
榕葉滿庭鶯亂啼

酬夢得

日日臨池弄小雛還思寫論付官奴柳家新樣元和脚
且盡薑芽斂手徒

聞徹上人亡寄楊侍郎

東越高僧舊姓湯幾時瓊佩觸鳴璫空花一散不知處
誰采金英與侍郎

酬曹侍御

破額山前碧玉流
騷人遙駐木蘭舟
春風無限瀟湘意
欲採蘋花不自由

劉禹錫

石頭城

山圍故國周遭在
潮打空城寂寞回
淮水東邊舊時月
夜深還過女牆來

烏衣巷

朱雀橋邊野草花
烏衣巷口夕陽斜
舊時王謝堂前燕
飛入尋常百姓家

江令宅

南朝詞臣北朝客
歸來唯見秦淮碧
池臺竹樹三畝餘
至今人道江家宅

與歌者米嘉榮

唱得涼州意外聲
舊人唯數米嘉榮
近來時世輕先輩
好染髭鬚事後生

聽舊宮人穆氏唱歌

曾隨織女渡天河記得雲間第一歌
休唱貞元供奉曲當時朝士已無多

與歌者何戡

二十餘年別帝京重聞天樂不勝情
舊人唯有何戡在更與殷勤唱渭城

堤上行二首

酒旗相望大堤頭堤下連檣堤上樓
日暮行人爭渡急

槳聲鴉軋滿中流

江南江北望烟波
入夜行人相應歌
桃葉傳情竹枝怨
水流無限月明多

踏歌詞二首

春江月出大堤平
堤上女郎連袂行
唱盡新詞歡不見
紅霞映樹鷓鴣鳴

桃蹊柳陌好經過
燈下妝成月下歌
為是襄王故宮地
至今猶自細腰多

竹枝詞八首

白帝城頭春草生
白鹽山下蜀江清
南人上來歌一曲
北人莫上動鄉情

山桃紅花滿上頭
蜀江春水拍山流
花紅易衰似郎意
水流無限似儂愁

日出三竿春霧消
江頭蜀客駐蘭橈
憑寄狂夫書一紙
住在成都萬里橋

城西門前滌瀨堆
年年波浪不能摧
懊惱人心不如石

少時東去復西來

瞿塘嘈嘈十二灘此中道路古來難
長恨人心不如水等閒平地起波瀾

山上層層桃李花雲間烟火是人家
銀釧金釵來負水長刀短笠去燒畬

楊柳青青江水平聞郎江上踏歌聲
東邊日出西邊雨道是無晴還有晴

楚水巴山烟雨多巴人能唱本鄉歌
今朝北客思歸去

回入紇那披綠羅

楊柳枝詞 三首

花萼樓前初種時
美人樓上鬪腰肢
如今拋擲長街裏
露葉如啼欲恨誰

煬帝行宮汴水濱
數株殘柳不勝春
晚來風起花如雪
飛入宮牆不見人

城外春風吹酒旗
行人揮袂日西時
長安陌上無窮樹
唯有垂楊管別離

浪淘沙詞

鸚鵡洲頭浪颭沙
青樓春望日將斜
銜泥燕子爭歸舍
獨自狂夫不憶家

碧澗寺見元九和展上人詩

廊下題詩滿壁塵
塔前松樹已鱗皴
古來唯有王文度
重見平生竺道人

春詞

新妝宜面下朱樓
深鎖春光一院愁
行到中庭數花朵

蜻蜓飛上玉搔頭

和令狐相公別牡丹

平章宅裏一闌花
臨到開時不在家
莫道兩京非遠別
春明門外即天涯

白居易

同李十一醉憶元九

花時同醉破春愁
醉折花枝作酒籌
忽憶故人天際去
計程今日到梁州

竹枝

瞿塘峽口水烟低
白帝城頭月向西
唱到竹枝聲咽處
斷猿啼鳥一時啼

宮詞

淚盡羅巾夢不成
夜深前殿按歌聲
紅顏未老恩先斷
斜倚熏籠坐到明

暮江吟

一道殘陽鋪水中
半江瑟瑟半江紅
誰憐九月初三夜

露似真珠月似弓

三月二十八日贈周判官

一春惆悵殘三日醉問周郎憶得無
柳絮送人鶯勸酒
去年今日到東都

伊州

老去將何散老愁
新教小玉唱伊州
亦應不得多年聽
未教成時已白頭

華州西

每逢人靜慵多歇不計程行困即眠上得籃輦未能去
春風敷水店門前

對酒

百歲無多時壯健一春能幾日
清明相逢且莫推辭醉
聽唱陽關第四聲

晚歸府

晚從履道來歸府街路雖長尹不嫌馬上涼於牀上坐
綠槐風透紫蕉衫

魏王堤

花寒嬾發鳥慵啼
信馬閒行到日西
何處未春先有思
柳條無力魏王堤

王子晉廟

子晉廟前山月明
人聞往往夜吹笙
鸞吟鳳唱聽無拍
多似霓裳散序聲

看采蓮

小桃閒上小蓮船
半采紅蓮半白蓮
不似江南惡風浪

芙蓉池在卧牀前

香山寺

空門寂靜老夫閒
伴鳥隨雲往復還
家醞滿瓶書滿架
半移生計入香山

木蘭花

膩如玉指塗朱粉
光似金刀翦紫霞
從此時時春夢裏
應添一樹女郎花

楊柳枝

紅板江橋青酒旗
館娃宮暖日斜時
可憐雨歇東風定
萬樹千條各自垂

酬裴令公贈馬相戲

安石風流無奈何
欲將赤驥換青娥
不辭便送東山去
臨老何人與唱歌

水調

五言一編最殷勤
調少情多似有因
不會當時翻曲意
此聲腸斷為何人

永豐坊園中垂柳

一樹春風千萬枝
嫩於金色軟於絲
永豐西角荒園裏
盡日無人屬阿誰

元稹

西明寺牡丹

花向琉璃地上生
光風炫轉紫雲英
自從天女盤中見
直至今朝眼更明

亞枝紅

平陽池上亞枝紅
悵望山郵事事同
還向萬竿深竹裏
一枝渾卧碧流中

梁州夢

夢君同繞曲江頭
也向慈恩院院遊
亭吏呼人排馬去
忽驚身在古梁州

嘉陵驛

嘉陵驛裏空牀客
一夜嘉陵江水聲
仍對牆南滿山樹
野花撩亂月朧明

嘉陵江

秦人惟識秦中水長想吳江與蜀江今日嘉川驛樓下
可憐如練繞明窓

好時節

身騎驄馬峨嵋下面帶霜威卓氏前虛度東川好時節
酒樓元被蜀兒眠

送孫勝

桐花暗淡柳惺忪池帶輕波柳帶風今日與君臨水別

可憐春盡宋亭中

岳陽樓

岳陽樓上日銜窓影倒深潭赤玉幢悵望殘春萬般意
滿櫺湖水入西江

寄庾敬休

小來同在曲江頭不省春時不共遊今日江風好暄暖
可憐春盡古湘州

西歸

五年江上損容顏
今日春風到武關
兩紙京書臨水讀
小桃花樹滿商山

重贈樂天

莫遣玲瓏唱我詩
我詩多是別君辭
明朝又向江頭別
月落潮平是去時

李德裕

長安秋夜

內官傳詔問戎機
載筆金鑾夜始歸
萬戶千門皆寂寂

月中清露點朝衣

李紳

却望芙蓉湖

丹橘村邊烟火微
碧波明處雁初飛
蕭條落日垂楊岸
隔水寥寥聞搗衣

王播

題惠照寺

二首

三十年前此院遊
木蘭花發院新修
如今再到經行地

樹老無花僧白頭

上堂已了各西東
慙愧闍梨飯後鐘
三十年来塵撲面
如今始得碧紗籠

熊孺登

送準上人歸石經院

旃檀刻像今猶少
白石鐫經古未曾
歸去又尋翻譯寺
前山應邇雁門僧

湘江夜汎

江流如箭月如弓行盡三湘數夜中
無那子規知向蜀一聲聲似怨春風

送僧

雲心自在山山去何處靈山不是歸
日暮寒林投古寺雪花飛滿水田衣

戎昱

移家別湖上亭

好去春風湖上亭柳條藤蔓繫離情
黃鶯久住渾相識

欲別頻啼四五聲

塞下曲

漢將歸來虜塞空
旌旗初下玉關東
高蹄戰馬三千匹
落日平原秋草中

途中寄李三

楊柳烟含灞岸春
年年攀折為行人
好風若借低枝便
莫遣青絲掃路塵

唐人萬首絕句選卷四

欽定四庫全書

唐人萬首絕句選卷五

宋 洪邁 元本

刑部尚書王士禎選

七言三

李賀

南園 二首

長卿牢落悲空舍
曼倩詎諧取自容
見買若耶溪水劍

明朝歸去事猿公

尋章摘句老雕蟲
曉月當簾挂玉弓
不見年年遼海上
文章何處哭秋風

昌谷北園新筍

斫取青光寫楚辭
膩香春粉黑離離
無情有恨何人見
露壓烟啼千萬枝

酬荅

雍州二月海池春
御水鵝鵲暖白蘋
試問酒旗歌板地

今朝誰是拘花人

呂溫

劉郎浦

吳蜀成婚此水潯明珠步障幄黃金誰將一女輕天下
欲換劉郎鼎峙心

楊巨源

僧院聽琴

禪思何妨在玉琴真僧不見聽時心離聲怨調秋堂夕

雲向蒼梧湘水深

贈崔駙馬

百尺梧桐畫閣齊
簫聲落處彩雲低
平陽不惜黃金埒
細雨花驄踏作泥

聽李憑彈箏篴

聽奏繁弦玉殿清
風傳曲度禁林明
君王聽樂梨園暖
翻到雲門第幾聲

觀妓人入道

荀令歌鐘北里亭
翠蛾紅粉散雲屏
舞衣施盡餘香在
今日花前學誦經

盧仝

逢鄭三游山

相逢之處花茸茸
石壁攢峰千萬重
他日期君何處好
寒流石上一株松

王涯

從軍詞

旄頭夜落捷書飛來奏金門著賜衣白馬將軍頻破敵
黃龍戍卒幾時歸

塞下曲

年少辭家從冠軍金鞍寶劍去邊勲不知馬骨傷寒水
唯見龍城起暮雲

秋夜曲

桂魄初生秋露微輕羅已薄未更衣銀箏夜久殷勤弄
心怯空房不忍歸

宮詞二首

一叢高鬢綠雲光
宮樣輕輕淡淡黃
為看九天公主貴
外邊爭學內家妝

炎炎夏日滿天時
桐葉交加覆玉墀
向晚移鐙上銀簾
叢叢綠鬢坐彈碁

令狐楚

少年行

家本清河住五城
須憑弓箭得功名
等閒飛鞚秋原上

獨向寒雲試射聲

舒元興

贈潭州李尚書

湘江舞罷忽成悲，便脫蠻韉出絳帷。
誰是蔡邕琴酒客，魏公懷舊嫁文姬。

張仲素

塞下曲

四首

三戍漁陽再渡遼，駢弓在臂劍橫腰。
匈奴似欲知名姓，

休傍陰山更射鵬

獵馬千行雁幾雙
燕然山下碧油幢
傳聲漠北單于破
火照旌旗夜受降

朔雪飄飄開雁門
平沙歷亂轉蓬根
功名恥記擒生數
直斬樓蘭報國恩

陰磧茫茫塞草肥
櫟峰上暮雲飛
交河北望天連海
蘇武曾持漢節歸

秋閨思 二首

碧窓斜日鵲深暉
愁聽寒螢淚溼衣
夢裏分明見關塞
不知何路向金微

秋天一夜靜無雲
斷續鴻聲到曉聞
欲寄征人問消息
居延城外又移軍

漢苑行

春風淡蕩景悠悠
鶯囀高枝燕入樓
千步迴廊聞鳳吹
珠簾處處上銀鉤

天馬詞

蹀躞宛駒齒未齊
撻金噴玉向風嘶
來時行盡金河道
獵獵輕風在碧蹄

張籍

送蜀客

蜀客南行祭碧雞
木棉花發錦江西
山橋日晚行人少
時有猩猩樹上啼

蠻中

銅柱南邊毒草春
行人幾日到金湍
玉鐙穿耳誰家女

自抱琵琶迎海神

蠻州

瘴水蠻中入洞流人家多住竹棚頭
青山海上無城郭
唯見松牌記象州

哭孟寂

曲江院裏題名處十九人中最少年
今日春光君不見
杏花零落寺門前

法雄寺東樓

汾陽舊宅今為寺，猶有當時歌舞樓。
四十年來車馬散，古槐深巷暮蟬愁。

秋思

洛陽城裏見秋風，欲作家書意萬重。
重復恐匆匆說不盡，行人臨發又開封。

涼州詞 二首

邊城暮雨雁飛低，蘆筍初生漸欲齊。
無數鈴聲遙過磧，應馱白練到安西。

鳳林關裏水東流白草黃榆六十秋邊將皆承主恩澤
無人解道取涼州

宮詞 二首

新鷹初放兔猶肥白日君王在內稀薄暮千門臨欲鎖
紅妝飛騎向前歸

黃金捍撥紫檀槽絃索初張調更高盡理昨來新上曲
內官簾外送櫻桃

寄李渤

五度溪頭躑躅紅
嵩陽寺裏講時鐘
春山處處行應好
一月看花到幾峰

春別曲

長江春水綠堪染
蓮葉出水大如錢
江頭橘樹君自種
那不長繫木蘭船

寒塘曲

寒塘沉沉柳葉疎
水暗人語驚栖鳬
舟中少年醉不起
持燭照水射游魚

王建

江陵使至汝州

回看巴路在雲間
寒食離家麥熟還
日暮數峰青似染
商人說是汝州山

華清宮

酒幔高樓一百家
宮前楊柳寺前花
內園分得溫湯水
二月中旬已進瓜

十五夜望月

中庭地白樹栖鴉
冷露無聲溼桂花
今夜月明人盡望
不知秋思在誰家

霓裳詞 四首

弟子部中留一色
聽風聽水作霓裳
散聲未足重來授
直到牀前見上皇

自直梨園得出稀
更番上曲不教歸
一時跪拜霓裳徹
立地階前賜紫衣

旋翻曲譜聲初足
除在梨園未教人
宣與書家分手寫

中官走馬賜功臣

傳呼法部按霓裳
新得承恩別作行
日晚貴妃樓上看
內人昇下綺羅箱

宮詞 二十四首

羅衫葉葉繡重重
金鳳銀鵝各一叢
每徧舞時分兩向
太平萬歲字當中

魚藻池中鎖翠娥
先皇行處不曾過
如今池底休鋪錦
菱角雞頭積漸多

內人相續報花開
准擬君王便看來
逢著五弦紅繡袋
宜春院裏按歌回

太儀前日暖房來
囑向昭陽乞藥栽
敕賜一窠紅躑躅
謝恩未了奏花開

御前新賜紫羅襦
不下金階上軟輿
宮局總來為喜樂
院中新拜內尚書

日冷天晴近臘時
玉階金瓦雪離離
離浴室門外抄名入
公主家人謝面脂

未承恩澤一家愁乍到宮中憶外頭求守管弦聲款逐
側商調裏唱伊州

東風潑火雨新休
昇盡春泥掃雪溝
走馬犢車當御路
漢陽公主進難毬

金吾除夜進儺名
畫袴朱衣四隊行
院院燒燈如白日
沈香火底坐吹笙

避暑昭陽不擲盧
井邊含水噴鴉雛
內中數日無呼喚
搦得滕王蛺蝶圖

延英引對碧衣郎江硯宣毫各別牀天子下簾親考試
宮人手裏過茶湯

新調白馬怕鞭聲供奉騎來繞殿行先報諸王侵早入
隔門催進打球名

對御難爭第一籌殿前不打背身毬內人唱好龜茲急
天子稍回過玉樓

城東北面望雲樓半下珠簾半上鉤騎馬行人長速過
恐防天子在樓頭

射生官女宿紅妝把得新弓各自張臨上馬時齊賜酒
男兒跪拜謝君王

紅蠻捍撥貼胸前移坐當頭近御筵用力獨彈金殿響
鳳皇飛出四條弦

家常愛著舊衣裳空挿紅梳不作妝忽地下階裙帶解
非時應得見君王

琵琶先抹綠腰頭小管丁寧側調愁半夜美人雙起唱
一聲聲出鳳皇樓

春池日暖少風波
花裏牽船上歌遙
索劍南新樣錦
東宮先釣得魚多

彈碁玉指兩參差
背局臨虛闕著危
先打角頭紅子落
上三金字半邊垂

叢叢洗手繞金盆
旋拭紅巾入殿門
衆裏遙拋金橘子
在前收得便承恩

宿妝殘粉未明天
總立昭陽花樹邊
寒食內人長白打
庫家先散與金錢

蓬萊正殿壓雲鰲紅日初生碧海濤開著五門遙北望

柘黃新篔御牀高

篔下浪切

移來女樂部頭邊新賜花檀木五弦綆得紅羅手帕子
當中更畫一雙蟬

鮑防

上巳寄孟中丞

世間禊事風流處鏡裏雲山若畫屏今日會稽王內史
好將賓客醉蘭亭

竇牟

奉誠園聞笛

曾絕朱纓吐錦茵
欲披荒草訪遺塵
秋風忽灑西園淚
滿目山陽笛裏人

竇庠

陪留守內巡至上陽宮感興

愁雲漠漠草離離
太液鉤陳處處疑
薄暮鰲垣春雨裏
殘花猶發萬年枝

寶鞏

襄陽寒食寄宇文籍

煙水初銷見萬家東風吹柳萬條斜
大隄欲上誰相伴
馬踏春泥半是花

洛中即事

高梧葉盡鳥巢空
洛水潺湲夕照中
寂寂天橋車馬絕
寒鴉飛入上陽宮

寄南游兄弟

書來未報幾時還
知在三湘五嶺間
獨立衡門秋水濶
寒鴉飛去日沈山

宮人斜

離宮路遠北原斜
生死深恩不到家
雲雨今歸何處去
黃鸝飛上野棠花

南游感興

傷心欲問前朝事
惟見江流去不回
日暮東風春草綠
鷓鴣飛上越王臺

楊憑

雨中怨秋

辭家遠客愴秋風
千里寒雲與斷蓬
日暮隔山投古寺
鐘聲何處雨濛濛

送客往荊州

巴丘過日暮登城
雲水湘東一色平
若愛春秋繁露學
正逢元凱鎮南荆

楊凝

初次巴陵

西江浪接洞庭波，積水遙連天上河。
鄉信為憑誰寄去，汀州燕雁漸來多。

送客入蜀

劍閣迢迢夢想間，行人歸路繞梁山。
明朝騎馬搖鞭去，秋雨槐花子午關。

楊凌

早春雪中

新年雨雪少晴時
屢失尋梅問柳期
鄉信憶隨回雁早
江春寒帶故陰遲

明妃曲

漢國明妃去不還
馬馱弦管向陰山
匣中縱有菱花鏡
羞向單于照舊顏

賈島

渡桑乾

客舍并州已十霜
歸心日夜憶咸陽
無端更渡桑乾水

却望并州是故鄉

宿林家亭子

牀頭枕是溪中石
井底泉通竹下池
宿客未眠過夜半
獨聞山雨到來時

贈人斑竹拄杖

揀得林中最細枝
結根石上長身遲
莫嫌滴瀝紅斑少
恰是湘妃淚盡時

張祜

千秋樂

八月平時花萼樓萬方同樂是千秋傾城人看長竿出
一枝初成趙解愁

春鶯轉

興慶池南柳未開太真先把一枝梅內人已唱春鶯轉
花下傚傚軟舞來

邠王小管

虢國潛行韓國隨宜春深院映花枝金輿遠幸無人見

偷把邠王小管吹

孟才人

偶因歌態詠嬌頻傳唱宮中十二春
却為一聲河滿子下泉湏弔孟才人

折楊柳

凝碧池邊斂翠眉
景陽樓下綰青絲
那勝妃子朝元閣
玉手和烟弄一枝

華清宮 二首

天闕沉沉夜未央
碧雲仙曲舞霓裳
一聲玉笛向空盡
月滿驪山宮漏長

紅樹蕭蕭閣半開
上皇曾幸此宮來
至今風俗驪山下
村笛猶吹阿濫堆

集靈臺二首

日光斜照集靈臺
紅樹花迎曉露開
昨夜上皇新授籙
太真含笑入簾來

虢國夫人承主恩
平明騎馬入公門
却嫌脂粉污顏色

淡掃蛾眉朝至尊

阿鵲湯

月照宮城紅樹芳
綠窓燈影在雕梁
金輿未到長生殿
妃子偷尋阿鵲湯

雨霖鈴

雨霖鈴夜却歸秦
猶見張徽一曲新
長說上皇和淚教
月明南內更無人

宿盆浦逢崔昇

江流不動月西沉
南北行人萬里心
況是相逢雁天夕
星河寥落水雲深

聽箏

十指纖纖玉筍紅
雁行輕過翠絃中
分明似說長城苦
水咽雲寒一夜風

楚州韋中丞瑩篴

千重鈎鎖撼金鈴
萬顆真珠瀉玉瓶
恰值滿堂人欲醉
甲光纔觸一時醒

金陵渡

金陵津渡小山樓一宿行人自欲愁
潮落夜江斜月裏兩三星火是瓜洲

遊淮南

十里長街市井連月明橋上看神仙
人生只合揚州死禪智山光好墓田

徐凝

漢宮曲

水色簾前流玉霜
趙家飛燕侍昭陽
掌中舞罷簫聲絕
三十六宮秋夜長

憶揚州

蕭娘臉下難勝淚
桃葉眉頭易得愁
天下三分明月夜
二分無賴是揚州

唐彥謙

穆天子傳

王母清歌玉琯悲
瑤臺應有再來期
穆王不得重相見

恐為無端哭盛姬

楚天

楚天遙望每長嘯
宋玉襄王盡作塵
不會瑤姬朝與暮
更為雲雨待何人

寄徐山人

一室清羸鶴體孤
體和神瑩爽冰壺
吳中高士雖求死
不那稽山有謝敷

垂柳

絆惹春風別有情
世間誰敢鬪輕盈
楚王江畔無端種
餓損纖腰學不成

鄧艾廟

昭烈遺黎死尚羞
揮刀斫石恨譙周
如何千載留遺廟
血食巴山伴武侯

曲江春望

杏艷桃光奪晚霞
樂遊無廟有年華
漢朝冠蓋皆陵墓
十里宜春下苑花

落花

紛紛從此見花殘
轉覺長繩繫日難
樓上有愁春不淺
小桃風雪凭闌干

仲山

千載遺蹤寄薜蘿
沛中鄉里漢山河
長陵亦是閒丘隴
異日誰知與仲多

洛神

人世仙家本自殊
何須相見向中途
驚鴻瞥過游龍去

漫惱陳王一事無

長安秋望

柳短莎長溪水流
雨微烟暝立溪頭
寒鴉閃閃前山去

杜曲黃昏獨自愁

裴交泰

長門怨

自閉長門經幾秋
羅衣溼盡淚還流
一種蛾眉明月夜

南宮歌管北宮愁

羊士諤

望女几山

女几山頭春雪消
路傍仙杏發柔條
心期欲去知何日
惆悵回車上野橋

登樓

槐柳蕭疎繞郡城
夜添山雨作江聲
秋風南陌無車馬
獨上高樓故國情

憶江南舊遊



山陰道上桂花初
王謝風流滿
晉書會作江南部從事
秋來還復憶鱸魚

郡中

紅衣落盡暗香殘
葉上秋光白露寒
越女含情已無限
莫教長袖倚闌干

汎舟後溪

雨餘芳草淨沙塵
水綠灘平一帶春
唯有啼鶻似留客
桃花深處更無人

盧隱

雨霽登北原

稻黃撲撲黍油油
野樹連山澗自流
憶得年時馮翊部
謝郎相引上樓頭

朱慶餘

宮中詞

寂寂花時閉院門
美人相並立瓊軒
含情欲說宮中事
鸚鵡前頭不敢言

劉商

題黃陂夫人祠

蒼山雲雨逐明神
唯有香名歲歲春
東風三月黃陂水
只見桃花不見人

題潘師房

渡水傍山尋絕壁
白雲飛處洞門開
仙人來往行無跡
石徑春風長綠苔

錢珣

春恨

負罪將軍在北朝
秦淮芳草綠迢迢
高臺愛妾魂銷盡
憑仗丘遲為一招

李羣玉

寄友

野水晴山雪後時
獨行村路更相思
無因一向溪頭醉
處處寒梅映酒旗

漢陽太白樓

江上晴樓翠靄間，滿簾春水滿窓山。
青楓綠草將愁去，遠入吳雲暝不還。

南莊春曉

草暖沙長望去舟，微茫烟浪向巴丘。
沅湘寂寂春歸盡，水綠蘋香人自愁。

黃陵廟

黃陵廟前莎草春，黃陵女兒茜裙新。
輕舟小櫂唱歌去，水遠山長愁殺人。

題王侍御宅

門向滄江碧嶂開
地多鷗鷺少塵埃
綠陰十里灘聲裏
閒去王家看竹來

殷堯藩

贈歌人郭婉

石家金谷舊歌人
起唱花筵淚滿巾
紅粉少年諸弟子
一時怊悵望梁塵

鮑溶

隋宮

柳塘烟起日西斜
竹浦風迴雁弄沙
煬帝春游古城在
壞宮芳草滿人家

贈楊鍊師二首

紫烟衣上繡春雲
清隱山書小篆文
明月在天將鳳管
夜深吹向玉宸君

道士夜誦藥珠經
白鶴下繞香烟聽
夜移經盡人上鶴
天風吹入秋冥冥

漢宮詞

月映東窓似玉輪
未央前殿絕聲塵
宮槐花落西風起
鸚鵡驚寒夜喚人

繁知一

題巫山廟

忠州刺史今才子
行到巫山定有詩
為報高唐神女道
早排雲雨候清辭

薛宜僚

別妓段東美

阿母桃花方似錦
王孫芳草正如烟
不須更向滄溟望
惆悵歡情恰一年

嚴休復

聞玉蕊院真人降

羽車潛下玉龜山
塵世何由覩薜顏
唯有無情枝上雪
好風吹綴綠雲鬟

陳羽

吳中覽古

吳王舊國水烟空
香徑無人蘭葉紅
春色似憐歌舞地
年年先發館娃宮

將歸舊山留別

相共遊梁今獨還
異鄉搖落憶青山
信陵死後無公子
徒向夷門學抱關

湘君祠

二妃哭處湘江深
二妃愁處雲沉沉
商人酒滴廟前草

蕭颯風生斑竹林

襄陽過孟子舊居

襄陽城郭春風裏
漢水東流去不還
孟子死來江樹老
烟霞猶在鹿門山



唐人萬首絕句選卷五